



pngelectionprinting.com



POSTERS BANNERS CARDS A-FRAMES FLYERS CAR STICKERS CORFLUTE SIGNS

**8 PES Saplimen
bilong NAQIA i
stap insait -**

**P7,8,9,10,
19,20,21 na 22**

Bagarap long Okuk Haiwe



Stori na poto: Loutova Siapea

ROT seksen bilong bikpela Okuk Haiwe namel long Yonki na Kainantu long isten Hailans we i wok long bruk na kamapim planti hevi long ol bikpela kago trak, PMV na jenerel pablik husat i save yusim dispela rot long ran i go i kam long wokim bisnis bilong ol.

I gat planti ol arapela seksen tu insait yet long isten Hailans na i go antap olsem long Simbu, Ji-waka, Westen, Enga, Sauten na Hela provins tu we i gat ol seksen we i wok long bruk yet na i kamapim moa hevi long ol lain husat i save ranim ol bikpela trak bisnis.

Askim nau i stap em, wanem taim bai gavman i mekim wok long stretim gut dispela haiwe?

Kumul Telikom bai givim gut sevis

GAVMAN i glasim olsem bisnis bi-long telekomunikesen bai ran gut, mekim winmani na givim gut sevis long pipel taim ol i bungim Telikom PNG Limited, PNG Dataco na bmobile aninit long wanpela kampani tasol.

Minista bilong Nesenel Plening na Ekting Minista bilong Pablik Entaprais na Stet Invesmen, Charles Abel, i tok gavman i kamapim Kumul Telikom Holdings Limited (KTHL) long bungim dispela tripela stet-on entaprais (SOE) i kamap wanpela tasol.

Mista Abel i tok Telikom PNG Limited i senisim nem i kamap

Senis long kamapim mama kampani KTHL

KTHL. Tasol kabinet i no makim yet nupela menesing dairekta bi-long dispela kampani.

"As bilong dispela senis em long kamapim wanpela mama kampani, KTKL. PNG Dataco na bmobile bai kamap sabsideri kampani bilong KTHL.

"I no gutpela long yumi larim Telikom PNG Limited i kamapim kompetisen wantaim bmobile na PNG Dataco.

"Gavman em i papa bilong dispela tripela kampani. Mipela i skelim olsem dispela tripela kampani bai ran gut aninit long wanpela bod, bihainim wanpela visen, long karimaut wanpela misen.

"Long dispela as, mipela i senisim nem bilong Telikom PNG Limited i go long KTHL. KTHL em i kamap 100 pesen sabsideri kampani bilong Kumul Consolidated Holdings Limited (KCH)," Mista Abel i tok.

Em i tok mani mak bilong ranim dispela tripela kampani bai go daun taim ol i bungim wantaim.

"Ol tripela kampani bai wok bung wantaim na skelim risos. Olgeta tripela kampani i save mekim bisnis o givim sevis long telekomunikesen, data na mobail komunikesen sevis," Mista Abel i tok.

Gavman i no makim nupela menesing dairekta tasol ol dairekta bilong KTHL em ol; Mahesh Patel (Siaman), Rueben Kautu (Deputi Siaman), Cedric

Rondoke (dairekta), Kili Tambua (dairekta), Avia Koisen (dairekta) na Andrew Johnson (dairekta).

Mista Abel i tok ol wok program na bisnis plen bilong ol dispela tripela kampani bai no inap senis.

"Olgeta samting bilong opere-sen bai no inap senis. Mi laik askim ol wok manmeri long wokbung wantaim nupela menesmen na bod bilong dispela kampani.

"Em i kampani bilong gavman, kampani bilong yumi. Olgeta manmeri i mas bungim tingting na wok bung wantaim long strongim gro bilong kampani na givim gut sevis long pipel," Mista Abel i tok.



GROWN FOR THE PEOPLE OF PNG



Toktok bilong Ileksen
Wantaim Fr. Roger Purcell msc

Pasin bilong harim na toktok

OL i save tok olsem yumi gat tupela yau na wanpela maus, olsem na yumi mas harim toktok tupela taim na toktok wanpela taim tasol.

TOKTOK bilong yumi long dispela mun em long harim toktok na mekim toktok em i tupela bikipela samting long laip.

Yumni mas harim moa gut wantaim bikipela laik long kisim save long ol lain husat i wok long toktok, na yumi no ken tingting hariap long mekim toktok na i no tingting gut long wanem samting yumi laik toktok long en, o i no wet inap narapela i pinis long toktok. Taim yumi toktok yumi mas toktok long tok tru, long wei yumi save long en, na wei yumi inap long en.

Long dispela taim bilong ileksen bai i gat planti toktok i kam long ol kendiket na ol lida husat i laikim yumi bai harim toktok bilong ol. Dispela em i gutpela tasol ol bai harim ol vota i toktok tru o no gat? Bai yumi tok gen olsem bai ol i go insait long we bilong toktok o no gat? Ol vota tu bai ol inap opim maus na tok aut tok tru ol i save long en o no gat?

Bilong toktok i kamap i gat sampela samting we i mas i stap pastaim long yumi statim toktok.

Pastaim yumi mas i gat trupela rispek long ol narapela lain olsem wanpela man na wanpela pikinini bilong God. Sapos dispela rispek i no stap, orait yumi bai no inap long redi long harim wanem samting ol i toktok. Namba tu, dispela rispek i mas stap bilong gutpela nem bilong narapela man o meri. Em i mas gat gutpela nem olsem wanpela pikinini bilong God i wankain olsem ol narapela man o meri long komyniti long ples. Yumi olgeta em God i givim yumi gutpela nem na pasin maskim wanpela kain skin, kantri, man o meri, lotu o kalsa o eduksen yumi gat.

Nau taim yumi wok long lukluk long nesenel ileksen we yumi mas gat strongpela tingting long gutpela bilong wan wan man na meri na rait bilong yumi long kisim rispek; wan wan meri na man, ol lida na ol lain i bihainim ol, ol vota na kendiket, grasrut o manmeri i gat eduksen, ples man o man long siti.

Bai gat wanpela bikipela nid long toktok, dibet o tok resis na toktok pait na em i orait long mekim. Olgeta kain samting i mas kamap insait long trupela spirit bilong toktok, harim wantaim gutpela tingting na tokaut long tok tru.

I mas gat moa toktok i go i kam, no ken mekim planti spis o bikipela toktok tumasp; moa dibet o tok resis, no ken givim tok oda tumas, na mekim moa askim ol kwesten na askim long ansa i mas kamap.

Parkop no wanbel long Sir Mekere i laik salensim em

NCD Gavana Powes Parkop i no wanbel long pastaim praim minista na memba bilong Mosbi Not Wes, Sir Mekere Morauta, i laik sanap gen long 2017 Nesenel Ileksen.

Mista Parkop i tok Sir Mekere i risain pinis na lusim politikis long yia 2012 tasol nau em i laik kambek gen na salensim em long kisim sia bilong Nesenel Kapitel Distrik (NCD).

Mista Parkop i tok Sir Mekere i abrusim 70 yia pinis na em i no gutpela sapos em i kam bek gen long sanap long NCD gavana.

"Em i hangre long kam bek gen long politikis tasol dispela i no soim gutpela pasin. Mi no ting em i laik mekim sampela gutpela samting long helpim ol pipel bilong Pot Mosbi tasol em i laik mekim samting bilong em yet," Mista Parkop i tok.

Sir Mekere i putim wanpela midia rilis long niuspepa na i tok



NCD Gavana Powes Parkop

em i rait bilong em aninit long lo long sanap long ileksen, na i no gat wanpela man i ken stopim.

"Lo na kot tasol bai stopim mi long sanap long politikis. Mi laik risain o kambek gen long politikis, dispela em i samting bilong mi yet. I luk olsem Mista Parkop i prèt pinis taim mi laik salenisim em," em i tok.

Sir Mekere i tok Praim Minista Peter O'Neill i no ranim gut

dispela kantri na em i laik kambek gen long Palamen long stretim ol samting we gavman bilong O'Neill i bagarapim.

Oposisen Lida Don Polye i amamas long Sir Mekere i laik kambek gen long politikis na i laik salensim Powes Parkop long kisim sia bilong NCD gavana.

"Taim Gren Sif Sir Michael Somare i laik lusim politikis, em i gutpela long pastaim praim minista Sir Mekere i kambek gen na soim gutpela lidasip long ol yangpela lida long Palamen," Mista Polye i tok.

Em i tok kantri i nidim ol gutpela lida olsem Sir Mekere, Sir Julius, Sir Rabbie Namaliu na arapela ol senia lida bilong kantri, husat i ken soim stretpela pasin bilong bihainim lo na jastis, demokrasi na gutpela gavans.

Minista bilong Piseris, Mao Zeming, i tok Sir Mekere i bin

stap 15 yia olsem memba bilong Mosbi Not Wes, tasol em i no bin yusim gut dispela sans long senisim Pot Mosbi.

"Dispela man Sir Mekere i bin stap Praim Minista, Oposisen Lida, Minista, Siaman bilong NCD, na memba bilong Mosbi Not Wes inap 15 yia olgeta.

"Taim em i bin stap praim minista taim, em i no bin mekim wanpela gutpela samting."

"Em i stap praim minista na ol polisman i bin sutim ol sumatin bilong UPNG. Em i bin daunim sais bilong ami na polis, em i bin rausim planti ol pablik sevan na wok manmeri bilong ol gavman dipatmen.

"Nau em i laik kambek gen long politikis long mekim wanem?" Mista Zeming, husat i Deputi Palamentri lida bilong People's National Congress (PNC) Pati na memba bilong Tewai-Siasi, i tok.

LLG memba ken sanap long Nesenel Ileksen

OL memba bilong lokal level gavman (LLG) i ken sanap long 2017 Nesenel Ileksen sapos ol i laik long sanap, Ilektoral Komisina Patalias Gamato i tok.

Mista Gamato i tok Seksen 30 bilong Ogenik Lo bilong Provinsal na Lokal Level Gavman (LLG) i givim ol tok orait long ol i ken sanap long ileksen o holim arapela pablik lidasip wok.

Mista Gamato i tok dispela Ogenik Lo i no stopim ol lokal kaunsil o ol kaunsil presiden long sanap long ileksen na resis long kamap memba bilong Nesenel Palamen.

Seksen 30 bilong Ogenik Lo i tokaut klia long taim we ol LLG memba i ken risain na kontes long Nesenel Ileksen," Mista Gamato i tok.

Mista Gamato i tok Seksen 31 bilong dispela ogenik lo i no tok long ol LLG memba bai risain taim ol i laik sanap long Nesenel Ileksen.

"PNG Electoral Commission



Ilektoral Komisina Patalias Gamato

(PNGEC) i no gat pawa long rausim nominesen bilong ol LLG memba, ol i ken sanap long Nesenel Ileksen," Mista Gamato i tok.

Em i tok Dipatmen ov Provinsal na Lokal Level Gavman i mas lukim dispela na sekim sapos em i orait o no gat long ranim ileksen long bihainim taim.

Long wankain samting, ol LLG presiden husat i laik sanap

long 2017 Nesenel Ileksen i mas risain bipo long Epril 20 we ol rit pepa bai kamaut.

"Maski lo i no tok long ol i ken risain, tasol ol i mas risain bikos no gut ol i yusim mani na ol samting bilong LLG olsem kar or LLG fan long mekim ileksen kempen bilong ol," Mista Gamato i tok.

Seksen 5 bilong Ogenik Lo bilong Diutis na Responsibilitis (OLDRL) i stopim lida long yusim opis bilong em long kisim pesonel benefit.

Sapos memba bilong LLG i yusim pablik fan o mani bilong gavman long mekim ileksen kempen bilong em, dispela i no stretpela pasin aninit long lo.

"LLG Presiden bai brukim Ogenik Lo na kot i ken holim ol sapos ol i yusim mani pablik mani na mekim ileksen kempein.

"Long dispela as, mipela i no laik long larim ol i yusim kar o ol samting bilong LLG long mekim kempen bilong ileksen. "Dispela em i satming bilong

kamapim pesenel intres na lo bai holim ol aninit long lo bilong miskondak long opis," Mista Gamato i tok.

Em i tok long dispela as, ol LLG presiden husta i laik sanap long 2017 Nesenel Ileksen i mas givim toksave pepa o notis long PNGEC bipo long ol i sanap long ileksen.

Seksen 27 bilong Konstitusen o Mama Lo i tok ol lida i no ken yusim ol samting bilong gavman long kisim ol benefit bilong ol yet.

Dispela i ken givim tingting no gut long pablik na ol bai no inap bilip long dispela lida long sevim ol.

"PNGEC i no gat pawa long rausim nominesen bilong ol LLG presiden sapos kendidet i stap presiden bilong LLG," Mista Gamato i tok.

"Ol presiden i mas toksave long PNGEC na ol i mas putim toksave pepa i kam long PNGEC pastaim long ol i go insait long ileksen," Mista Gamato i tok.

EXPERIENCE WORLD CLASS SERVICES

CALL: 1599



WE CARE FOR YOUR FUTURE!

Komisina tokaut long ol wok plen bilong tripela mun

ILEKTORAL Komisina Patalias Gamato i laikim olgeta wok manmeri bilong PNG Electoral Commission (PNGEC) long hetkwata long Pot Mosbi na long wan wan provinsal opis long mekim wok stret long kamapim gutpela ileksen long dispela yia.

Mista Gamato i tok em i laik lukim ol wok manmeri bilong PNGEC i kam long wok long olgeta de, statim wok long taim na pinis long taim, putim gutpela klos, bihainim toktok na daunim ol yet, na bihainim pasin bilong PNGEC long mekim wok.

Mista Gamato i tok long narapela tripela mun bihain, stat long Januери, PNGEC bai mekim ol dispela wok;

Januери – putim nem bilong olgeta manmeri husat inap long vot long ilektoral rol,

Februери – ol manmeri o kendidet husat i no wanbel long ilektoral rol i ken rausim sampela nem,

Mas – pinisim laspela ilektoral rol na redi long yusim long taim bilong ileksen.

Mista Gamato i tokim olgeta provinsal ileksen menesa long kamapim wok plen bilong ol long wan wan de na redim ol yet long larim dispela ileksen i kamap gut.

Em i tok ol wan wan ileksen menesa i stap long 22 provins i mas bihainim dispela wok plen bilong ol taim ol rit pepa i kamaut long Epril 20.

PNGEC i makim pinis ol ritening opisa bilong ranim ileksen long wan wan lokal level gavman (LLG) eria. PNGEC i salim pinis ol nem bilong wan wan ritening opisa i go long Gavman Printa long prinin na gesetim.

Wok bilong ol ritening opisa na asisten ritening opisa bai pinis long Desember 31, 2017

PNGEC i kamapim pinis Nesenel Logistik na Prokumen Plen (NLPP) long yusim long taim bilong ileksen.

Mista Gamato i tok NLPP masta plen bilong ranim ileksen na PNGEC bai givim kopi bilong dispela plen long wan wan PNGEC brens long PNG, long ol ileksen menesa, gavman opisl, foren misin na arapela ol stekholda.

Em i tok PNGEC bai yusim NLPP bai yusim kisim ol bikpela samting bilong ileksen olsem:

Bokis bilong putim vot pepa,

Gavana Jeneral Sir Michael Ogio i dai

NAMBA 9 Gavana Jeneral bilong Papua Niugini (PNG), Gren Sif Sir Michael Ogio, i dai long Sarere 18 Februери 2017.

Toktok i kam long opis bilong Gavana Jeneral i tok Sir Michael i bin sik na i bin go kam long haus sik long Singapore na em i dai long 3:50 apinun long Gavman Haus long Konedobu, Pot Mosbi.

Krismas bilong em i bin 75 yia.

"Mipela i sori tru long tokim ol pipel bilong PNG olsem Gavana Jeneral Gren Sif Sir Michael Ogio i dai long Sarere apinun," stetmen i kam long Gavman Haus i tok.

Gren Sif Sir Michael Ogio i bin kamap namba 9 Gavana Jeneral bilong PNG long Januери 2011.

Sir Michael, husat i bilong Tinputz long Not Bogenvil, i lusim meri bilong em Ledi Esmie Ogio, 5-pela pikinini, 8-pela bubu na i dai.

Ekting Opisal Seketeri bilong Gavana Jeneral, Ezekiel Vene, i tok; "Mipela i sori tru long tokim ol pipel bilong PNG olsem Gavana Jeneral bilong yumi i dai.

"Mipela i askim pipel long beten long famili bilong Sir Michael i ken bel isi na gutpela tingting long dispela taim bilong sori.

"Mipela i askim pipel long soim rispek long famili bilong Sir Michael na opis bilong Gavana Jeneral long dispela hat taim."

Sir Michael i dai taim em i laik mekim henova tekova seremoni wantaim nupela Gavana Jeneral, Bob Dadae.

Palamen i bin votim memba bilong Kabwum i kamap namba 10 Gavana Jeneral bilong PNG taim tem bilong Sir Michael i pinis long mun Februери long dispela yia.

Praim Minista Peter O'Neill salim tok sori i go long ol wok manmeri bilong Gavman Haus, na long meri bilong Sir Michael, Ledi Esmie Ogio, na long ol pikinini na bubu bilong Sir Michael.

"Mi makim maus bilong gav-

man na pipel bilong PNG, na salim tok sori i go long famili bilong Sir Michael Ogio," Mista O'Neill i tok.

Mista O'Neill i tok Sir Michael i bin mekim gut wok bilong Gavana Jeneral na em i wanpela senia lida

bilong kantri, husat i save stap isi na sevim pipel long planti sariti wok.

Oposisen Lida Don Polye tu i salim tok sori bilong em i go long famili bilong Sir Michael na ol pipel bilong em long Tinputz long

Not Bogenvil.

"Mi makim maus bilong pipel bilong mi long Kandep na Oposisen tim na i salim bikpela tok sori i go long ol pipel bilong Tinputz long dai bilong Sir Michael," Mista Polye i tok.



NATIONAL JUDICIARY SERVICES CONDOLENCE MESSAGE

The Chief Justice Sir Salamo Injia, Kt GCL, on behalf of the Judiciary convey our deepest condolences and sympathies to Lady Esmie Ogio, his children, grand-children, immediate families, relatives and the people of the Autonomous Region of Bougainville where his Excellency hails from.

Late Grand Chief Sir Michael Ogio, GCL GCMG, KStJ,
Governor General of the Independent State of Papua New Guinea.



We express our appreciation for the many contributions he has made to the country in his term in Office.

Back to School is easy with a BSP Personal Loan..

WE ARE BSP

www.bsp.com.pg

BSP PERSONAL LOAN

Visit your nearest **BSP Branch** today to apply.

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

The following branches will be open to accept School Fee Deposits **ONLY** on **SATURDAY, 28 JANUARY & 4 FEBRUARY 2017 | FROM 8:45AM - 12:00PM.**

- ✓ Boroko Branch – NCD
- ✓ Lae Market Branch – Morobe
- ✓ Madang Branch – Madang



Senis bilong deit em i orait

SENIS bilong deit bi-long givim ol rit pepa long Epril 20 i go inap Mei 20 em i orait aninit long lo bilong ileksen, ilektoral Komisina Patalias Gamato i tok.

Mista Gamato i tok lo i givim tok orait long mekim dispela kain senis. Em i tok taim gavman i kamapim dispela senis, deit bilong dispela bai makim stret 5-yia anivesari bilong dispela tem bilong Nesenel Palamen na dispela em i orait aninit

long lo bilong ileksen.

PNGEC i tok gavman i laik mekim 7-pela nupela senis long ol lo bilong ranim ileksen long kantri.

Wanpela bilong dispela senis bai lukim gavman i senisim lo long daunim taim bilong ileksen kempen i kam long wanpela mun tasol.

PNGEC i tok Gavman i laik mekim sampela moa senis na dispela bai lukim 7-pela senis i kamap long Ogenik Lo bilong Nesenel na Lokal

Level Gavman (LLG) ileksen.

Dispela senis we gavman i tingting long mekim em ol:

Daunim 8 wiks bilong kempen i kam daun long 4 wiks tasol;

Senisim taim bilong nesenel ileksen na LLG ileksen;

Apim K1, 000 nominesen fi i go antap long K10,000 bilong nesenel ileksen na apim K200 nominesen fi bilong LLG ileksen i go antap long K1, 000;

Apim K5, 000 ileksen

petisen fi i go moa long K20,000;

Ol ples bilong givim ileksen petisen bai 4-pela ples tasol insait long wan wan rijon;

Ol provinsal gavman bai ranim ol LLG ileksen; na

Onlain registresen (enrolmen) bilong ol elijibel vota o manmeri husat inap long vot.

PNGEC i tok sampela moa senis long ol lo bilong ileksen bai kamap bihain long 2017 Nesenel Ileksen i pinis.

Pop Franciscus i tok sori long dai bilong Gavana Jeneral bilong PNG

LONG taim opis bilong Pop Franciscus i kisim toksave bilong dai bilong Gavana Jeneral, Sir Michael Ogio long wiken, Pop Franciscus i salim wanpela tok sori bilong en i kam long opis bilong Gavana Jeneral na em i tok olsem:

“ Mi bin gat bikipela sori tru long harim olsem His Ekselensi Michael Ogion i dai, na mi laik salim bikipela bel sori bilong mi i go long meri na famili bilong leit Gavana Jeneral, na tu long Gavman na ol pipel bi-

long Papua Niugini. Mi tingim wok pablik sevis bilong Sir Michael long kantri na bikipela luksave we ol pipel i gat long em, olsem na mi pre olsem em bai kisim malolo bilong bilong oltaim, oltaim long sol bilong em. Long olgeta

famili na ol lain husat i sori na krai i stap, mi pre long divain blesing bilong bel isi na strong.”

Wantaim bikipela tenkyu long gutpela helpim bilong yu, mi yet.

Franciscus PP.



NATIONAL & SUPREME COURT OF JUSTICE OFFICE OF THE SHERIFF

NJSS Media Release

The start of the 2017 Legal Year brings changes to the Waigani Court Complex.

The commencement of new car parking spaces and the installation of new security screening point, including a Walk Through Metal Detector.

The screening is an additional measure to ensure all court users can access justice without the fear of violence or the threat of weapons.

The screening process is similar to that at the Jacksons airport. All court users and legal profession will be subject to the screening process.

Court users are requested to allow additional time to arrive and enter the complex.

It goes without saying that peak times will create demand and lines for entry. Users are asked to be patient and comply with directions to facilitate a smooth entry for all patrons.

For further information contact registrar's Office on 324 5700.

Ian Augerea
Sheriff of PNG



Presiden bilong Trust PNG Pati, Hansel Maven i kisim setifiket long han bilong Dokta Orovu Sepoe Sia pesen bilong Politikol Pati na Kenidet. Poto Nicky Bernard.

9-pela nupela Politikol Pati

Nicky Bernard i raitim

INTEGRITI ov Politikol Pati na Kendidet Komisnin i tok orait na givim setifiket i go long 9-pela nupela pati long 2017.

Tupela pati i bin kisim setifiket pepa bilong ol pastim bipo long 7-pela nupela pati i kisim bilong ol long las wik Fonde.

Dispela nau i mekim Politikol Pati go antap long 44 insait long Papua Niugini, dispela 7 nupela Pati em, **Paradise Kingdom Party**
PNG First Party
Model Nation Party
Trust PNG Party

PNG Youths Party
Nations Interest Party
na
PNG Socialist Party

Dispela 7-pela Parti nau bai wok hat long putim Kendidet bilong ol long dispela Nesenel Ileksen long 2017 long wanem em sotpela taim bipo long rits bai open.

Wanpela nupela pati we i bin gat network bilong em longpela taim em long Trust PNG Party. Dispela pati em ol bipo sumatin bilong Passam Nesenel High Skul.

Trust PNG Pati i kamap long ol Memba bilong Trust PNG Asosiesen long ol get

hap insait long PNG we ol eks sumatin bilong Passam.

Trust PNG Asosiesen i gat planti ol save manmeri na ol i gat bikipela ol wok insait long PNG, long sampela yia go pinis i pasim tok long kamapim wanpela Politikol Pati bilong ol. Dispela plen bilong ol i kamap bihain long ten yia na 2017 em kamapim dispela Pati bilong ol Trust PNG Pati.

Presiden bilong Pati Hansel Maven i tok tenkyu long ol pikinini na meri bilong ol memba bilong pati long wok bung wantaim ol man bilong ol long kamapim dispela Pati.

Intanesenel na rijonol obseva bai kam skelim ileksen

OL intanesenel na rijonol obseva bilong 2017 Nesenel Ileksen i kam pinis long kantri long mun Febueri na i go bek.

PNG Electoral Commission (PNGEC) i tok ol intanesenel na rijonol obseva bilong 2017 Nesenel Ileksen i kam mekim stadi wok o skoping, na i go bek gen long wan wan kantri bilong ol.

I gat 4-pela grup husat i kam long mekim ol stadi wok bilong glasim 2017 Nesenel Ileksen.

Ol dispela 4-pela grup em ol Komonwelt, Australia Hai Komisnin na Dipatmen ov Foren Afes

na Tred, Australian Nesenel Yunivesiti aninit long patnasip wantaim Yunivesiti ov PNG na Stet Sosaiti Gavanens long Melanesia Program, na Transperensi Intanesenel PNG Inc.

Taim vot i stat long Jun 24, ol dispela obseva bai kambek gen long skelim olsem wanem ileksen i wok long ran.

Ilektoral Komisina Patalias Gamato i tokim ol dispela lain long kam lukim ileksen na skelim sapos namba 9 Nesenel Palamen Ileksen i go gut o no gat.

Ol dispela obseva lain i givim gutpela bekim long PNGEC na ol bai

givim wok plen bilong ol long lukim ileksen.

PNGEC i tok ol dispela grup bai yusim mani bilong ol yet na kam lukim ileksen long dispela yia.

Rjonol grup olsem Pasifik Ailan Forum (PIF) na Melanesian Spiahet Grup (MSG) i no bekim askim bilong PNGEC long salim ileksen obseva tim bilong ol i kam long lukim dispela ileksen.

Long Disemba 2016, Yuropen Yunion (EU) Delegesen i kam long PNG i givim bekim pinis long PNGEC long salim obseva tim i kam skelim ileksen.



WANTOK
KOMENTRI

Nau i taim bilong stretim ol hevi bilong graun

OLGETA mun, i save gat nius bilong ol famili husat i no gat haus bikos papa bilong graun ol i sindaun long en i rausim ol. Yumi save lukim ol mama na pikinini i krai long taim ol buldosa i go insait brukim haus i go daun.

Dispela pasin i wok long kamap bikpela long ol kain ples olsem Mosbi siti na ol setelmen i stap arere long en.

Long taim dispela samting i kamap no gat man i save sanap baksait na traim sapotim ol bikos planti bilong ol dispela famili na ol setelmen i kamap nating. I no gat stretpela tok orait o taitel long graun.

Ol pipel i sindaun nating na strongim kona bilong ol long taim papa bilong graun i laik kisim bek propeti bilong em. Planti bilong ol i save karim kago na go painim ol wantok long narapela setelmen gen na stap wantaim ol inap ol i painim blok long narapela hap na sanapim haus.

Ol dispela pipel i gat rait long askim kwesten na kotim ol lain i bagarapim propeti bilong ol tu o nogat? I gat sampela loya husat i mekim wok bilong helpim ol o nogat? I gat infomesen long ol hap we pipel i ken sanapim haus bilong ol o nogat?

Em i wok bilong husat long



givimaut infomesen long ol pablik? Yumi luksave olsem long Mosbi, NCDC i wari tasol long ol eria insait long taun.

Ol i no bisi tumas long ol

setelmen o eria i stap ausait long olpela mak bilong siti. Ol i lusim ol dispela eria long han bilong wan wan memba bilong palamen.

Ol eria ausait long siti olsem 8 Mail, 9 Mail na i go olsem i pulap long ol nupela setelmen na bisnis bilong ol ovasis kampani, bikos gavman i no bin

plen gut long bihain taim bilong siti. Ol nupela setelmen i kamap banisim matmat na kam arere tru long bikrot. Graun bilong matmat i sot. Na sapos gavman i laik rausim ol setelmen arere long rot, bai i gat planti kros i kamap.

Dispela pasin bilong hait na kisim nating graun bilong gavman o ol asples i kamap ples klia long NCD na Sentral provins. Long tok Inglis ol i tok, land grabbing.

I gat ol gavman dipatmen i stap long lukautim graun na kisim takis bilong graun.

I gat dipatmen i lukautim graun bilong gavman na ol i mas wok bung wantaim na mekim stret wok bilong ol.

Yumi stap long mak we hevi bilong graun i kamap ples klia. Graun bilong gavman i sot. Na ol stilman i wok long paulim na salim graun long ol ovasis kampani. Bai yumi mekim wanem?

Nau em i taim bilong opim ai na stretim ples.

Sapos yumi lukluk tasol nau, bai i no longtaim yumi kirap nogut na lukim ol draipela kapa na ain banis bilong ol ovasis kampani i banisim ol graun ausait long NCD.

“Truth”/tok tru bai mekim yu i fri

PLANTI manmeri long nau i mas save wanem samting i tok tru o long tok Inglis “true/truth.”

I gat planti mining long dispela tok. Long Oxford Edvens Inglis Diksinar “truth” i min samting we wanpela i ken lukim, pilim na i gat save long em (ekspiriens).

Long Baibel i gat planti tok tu long dispela tok we em i ken min God, Yahweh yet i tru or “truth.”

Sapos yumi givim mining bilong tok tru arere long mining bilong Baibel o kisim mining long Baibel, ol mining klostu i wankain.

Yumi ken tok mining bilong tru o tok tru i olsem samting wanpela i lukim, i harim, i pilim na i save long em.

Long tude planti hevi i pas bikos long as bilong tok tru.

Papamama i kros long pikinini i mas tok tru, famili i bruk bikos papa o mama i no tok tru, komyuniti i gat hevi bikos wanpela klen o traib i no tok tru na dispela i



wankain long nesenel level.

Wanpela saveman, Bob Dylan i tok: “Olgeta tok tru bungim wantaim i kamapim bikpela giaman!”

Sapos dispela i tru, em samting bilong wanpela long skelim.

Wanpela Ireland man Oscar Wilde i rait na tok: “Tok tru o truth olgeta taim i no save stret na i hat long painim.”

Long dispela as em i tok long dispela taim planti manmeri i gro long komyuniti we ol i no save wanem samting i tru na wanem samting i giaman, i rait o rong o gutpela o nogut.

Sampela taim ol i save mekim ol askim we ansa oltaim i no stret. Ol askim na bekim em:

I gat God o nogat? Bekim em ating nogat.

Graun na ol sta nau i stap, ol i kamap olsem wanem? Bekim em dispela i bihainim bikpela pairap tasol bipo long dispela mipela i no save.

Wanem samting i rait na wanem samting i rong? I no gat wanpela samting i stap bilong tokaut stret.

Mekim samting long laik bilong yu. Wanem samting bai kamap taim mi dai?

Ating em pinis bilong stap bilong yu, mipela i no save wanem samting moa mipela bai tok klia.

Nau yet yumi harim ol politisen i tok promis long kamapim ol samting tasol i luk olsem dispela em i no tok tru.

Promis i promis na i mas stap promis.

Taim mipela i lukim olsem mipela i ken askim ating tru o tok tru i samting nating?

Tok tru o stap tru o trupela samting i bikpela samting long laip.

Long Nu Testamen Jon 18:38 Ponsius Pilot i no tingting planti taim em i askim Jisas, “Tru i wanem samting,” Jon 18:32.

Bipo long dispela long Jon 8:32 Jisas i tok “Tok tru bai mekim yu fri.”

Stat bilong Gospel bilong Jon long 1:1 i tok long stat bilong ol samting Tok (Word) i stap, Tok i stap wantaim God na Tok yet i God na long Tok ol samting i kamap.

Jisas i tok “tok tru bai mekim yu fri” Jon 8:32.

Yes taim wanpela i tok tru, em bai pilim hevi em i karim i pinis..

Ating planti hevi ol komyuniti nau i bungim bai pinis sapos mipela olgeta i tok tru o save long wanem samting i tru, tokaut na mekim samting i stret.



WANTOK

Published Weekly, Thursday, for
Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

RIVIU BILONG WIK

No ken sasim moa skul fi

SAMPELA het tisa bilong skul insait long Morobe Provins i brukim lo bilong Provinseal Edukesen Bod(PEB) long taim ol i sasim moa skul fi long ol papamama. Provinsal Edukesen Ed-vaaisa bilong Morobe Provins, Keith Jiram, i tok, ol dispela het tisa husat i brukim lo bilong PEB bai kisim disiplin long Edukesen Bod.

Komyuniti kisim helpim long haus sik

MOA long 13,000 pipel insait long bikbus bilong Sohe na Ijivitari distrik i bin kisim helt tritmen long ol YWAM Medikel sip na ol wokman bilong haus sik bilong Noten Provins. Komyuniti helt woka Philip Tahima i tok, em i gutpela tru long wok wantaim ol wanwok husat i gat bikpela tingting long bringim helt kea i go long pipel insait long bikbus.

UNFPA bai lukluk long ol meri na pikinini

YUNAITET Nesen Populesen (UNFPA) Fan bai lukluk long ol hevi i save kamap long ol meri na pikinini insait long Papua Niugini. Nupela mausman bilong UNFPA long PNG, Koffi Kouame, i tok bai em i wok bung wantaim gavman long stopim ol dispela ol hevi. Kaume i tok tu olsem, ol marasin bilong spesim pikinini o kontraseptiv i stap yet long 24 pesen, famili plening i go antap long 36 pesen, na populesen i wok long gro long mak bilong 31 pesen.

Em i taim nau long kamapim wanbel long ol hevi bilong Bogenvil kraisis

Eleanor Maineke
i raitim

"Em i impoten long givim stia long wei bilong mekim wok," em i wanpela bikpela toktok we i bin kamap long wanpela woksop bilong ol ol Saut Bogenvil Rijonal Distrik Pis na Sekyuriti Komiti (DPSC) long Monoitu, Siwai Distrik long Saut Bogenvil.

Dispela woksop i bin stat long 14 Febueri na i go pinis long 17 Febueri 2017. Klostu 29 lain i bin kamap long dispela woksop na ol i kam long ol 4-pela distrik bilong Saut Bogenvil, em long Buin, Siwai, Bana na Torokina.

Bogenvil Program bilong Mekim Pis tim long Arawa i holim 4-pela de woksop. Bikpela tingting em long putim ol keis long ol wan wan eria bilong ol na long kamapim wanpela plen na baset bilong wan wan DPSC na



Siwai DPSC Memba i wokim ol presentesen long taim bilong woksop. Poto: Eleanor Maineke.

long luksave long ol kastom wok we i kamap long wokim ol bikpela wanbel na tok sori bung.

Bogenvil nau i stap long bikpela taim tru long redi long vot ov referendum long Jun 15 2019. Dispela as tasol na ol komyuniti i mas kam na wanbel na pasim dispela hap taim no gut bilong Bogenvil long bipo. Wanpela gutpela we ol i luksave long mekim dispela samting hariap em long ol bungim planti lain wantaim long bringim bel isi na wanbel namel long ol.

Gavman bilong Australia bai sapotim yet wok bilong kamapim pis o bel isi na bikpela plen bilong en long Bogenvil wantaim patnasip bilong Atonomas Bogenvil Gavman.

Ol pipel bilong Bogenvil i mas kamapim gen pasin bilong bel isi na stap wanbel insait long ol famili, komyuniti na rijon.

People
connecting
Business People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg



Disis Kontrol Opisa bilong Oro, Gibson Kungkene i lukluk long maikroskop long lukim ol binatang bilong sik antap long MV YWAM PNG.

Wok bilong stopim sik TB i go het yet

WANPELA de, taim ol YWAM praimeri helt kea lain i wokim klinik i stap na ol i bungim Ruth.

Em i slip long han bilong mama tasol bodi bilong em i bun nating na i no strong.

Ol helt woka i luksave pinis long sik bilong Ruth – pes bilong em i tait na em i wok long pulim win strong.

Ruth i gat 5-pela krismas na ol helt woka i ting em i gat sik TB.

Ruth i bin wanpela bilong ol 4,44 sikman na meri YWAM Medikal Sip i bin lukim long taim ol i patrol long Oro inap 1-pela de na wok wantaim ol lokal helt woka. Ruth i wanpela bilong ol 106 sikman ol i bilip i gat sik TB.

Papua Niugini i gat planti moa pipel husat i gat sik TB. Disepela mak i winim ol arapela kantri long Pasifik rijon. Ol lain husat i gat sik TB i save pulapim ol bet long haus sik, winim ol arapela sik. Long 2014, Praim Minista Peter O'Neill i tokaut olsem sik TB i wanpela nesenel imejensi long kantri.

Nesenel gavman i promis long rausim sik TB long Papua Niugini long taim yumi bungim yia 2050. Ol provinsal gavman, lokal helt woka na ol NGO i bung wantaim long kamapim tru dispela promis bilong rausim dispela sik nogut long kantri.

MV YWAM PNG i gat nupela laboratoriu nau long sip na dispela laboratoriu bai helpim long sekap hariap long ol sikmanmeri long ples na lukim sapos ol i gat sik TB o nogat.

Risets saintis bilong YWAM Medikal Sip, April Harper, i tok long taim ol i raun long Oro, ol i testim 64 sikman long sik TB na ol i painim 49 husat i gat dispela sik.

Em i tok ol i laki bikos Disis Kontrol Opisa bilong Oro, Gibson Kungkene i bin stap wantaim ol. Long taim ol i painimaut husat i gat sik TB, Gibson i kisim ol nem na ples bilong ol em i stretim ol marasin long givim long ol dispela sikman.

Gibson Kungkene i wok long Oro inap 10-pela yia nau na i save raun i go long ol

Keles Draiving em i kamapim hevi long ol pasindia

Eleanor Maineke i raitim

ROT sefti em i impoten tru. Ol manmeri i ranim kar i mas save gut long sefti ruls.

Em i impotent tru tu long ol draiva i mas gat gutpela na inap save long ranim kar na kisim laisens. Bikos laip bilong ol pasindia i save stap long han bilong draiva taim em i ranim kar.

Last wik Fraidei i bin gat wanpla bikpela kar eksiden. Dispela eksiden i bin kamap long boda bilong Bana na Siwai distrik insait long Atonomas rijon

bilong Bogenvil.

Kar i bin lusim Arawa taun na i wok long go bek long ples long Siwai. Dispela PMV kar i bin karim sampla mama husat i bin wok long go bek long ples bihain long ol i bin go long Arawa haus sik.

Tasol wantaim keles draiving bilong draiva, kar i bin kapsait na 4-pla bilong ol dispela mama husat i bin kisim moa hevi na bagarap.

Olgeta 4-pela meri i stap nau long Buka Hausik long kisim gutpela helipim long ol bagarap ol i bin kisim.



Photo antap i soim wanpela bilong ol 4-pela meri husat i bin kisim bikpela bagarap long dispela eksiden. Ol dokta long Arawa haus sik i wok long helpim em long putim em long embulens bai go long Buka haus sik bikos Arawa haus sik i stap long renovesen na operating tieta i pas yet. Poto: Eleanor Maineke.

I gat 749 sik pipel long Oro inap lukluk gen

GUTPELA wok bilong YWAM Medikal Sips opthalmology (ai sejeri) insait long dispela mun i helpim 70 pipel long ol rurel ples bilong Oro Provins long ol inap long lukluk gen.

Dispela i kamap taim ophtalmoloji tim i bin go raun long rurel ples. Bikpela helpim i bin kam long Nu Briten Pam Oil Limited, Pasifik Intenesenel Haus sik na Laila Faundesen. Sampela 676 moa i kisim helpim long ai bilong ol long ol i ken kisim ol ai glas bilong lukluk na rit.

Ol ai dokta i wokim olgeta sejeri antap long MV YWAM PNG long wanpela de long taim bilong patrol i go long 18 ples long nambis na long ol bus ples long Ijivitari na Sohe Distrik.

YWAM Medical Sip Patna Rilesens Menesa, Dokta



Sik meri kamaul long ai sejeri i putim plasta long ai yet tasol wantaim smail long pes.

Sarah Dunn, i tok olsem gutpela wok i kamap bikos ol volandia i wok olsem wanpela tim.

“YWAM Medikal Sips, Nu Briten Pam Oil, Pasifik Intenesenel Haus sik na Laila Faundesen i bung wantaim na mekim wok long ol ai sejeri i kamap gut long taim bilong patrol.

“Nu Briten Pam Oil i painim ol sik lain, Pasifik Intenesenel Haus sik na Laila Faundesen i bringim wanpela

sejen, na wantaim ol narapela patna, YWAM Medical Sip i givim ol fasiliti na lojistik sapot.

Namel long ol 73 sejikal siklain, i bin gat wanpela nes bilong ol bebi bilong Tufi Helt Senta, Stanley Lekons. Mista Lekons i no bin inap long wok gut inap long las 5-pela yia bikos em i gat klaut long ai na em i no save lukluk gut long ritim ol prin long marasin vial na ol sampel.

Bihain long wan-

pela katerek sejeri, Mika Lekons i lukluk gut gen long mak bilong 6/60 long ai sat em i go long 6/9 daunbilo long ai sat wanpela de tasol bihain long sejeri o operesen bilong em. Wantaim dispela nupela helt bilong em, Stanley i tok em i laik go bek na wokim imunaisesen patrol gen long ol ketsmen eria bilong helt senta bilong em.

Wanpela Ophthalmologis bilong India, Dr Vivekaraj Jairaj i bin wokim sejeri bilong Mista Lekons. klostu tiam bai dispela dokta i kisim wok wantaim Pasifik Intenesenel Haus sik. Dr Jairaj i bin givim ol sevis bilong em fri long sapotim Laila Foundation.

MV YWAM PNG i bin stat go long Siassi Ailan long Morobe Provins, long wiken long statim narapela hap wok raun bilong en.

NFA opisa greduet wantaim nupela save

Paul Zuvani i raitim

INAP long 17-pela opisa long Nesenel Piseris Atoriti (NFA) i greduet wantaim setifiket bilong risets long Pot Mosbi long dispela wik.

Ol opisa i greduet bihain long ol i pinisim wanpela yia bilong skul aninit long Yuni-vesiti bilong Tasmani, Australia.

Skul bilong ol i kos moa long K2 milien (NFA K1m na Australia K1.5 milien - AU\$700).

Em i namba wan taim kain skul i kamap na i namba wantaim taim ol oganaisa i ronim long Papua Niugini we ol i hop long ronim long ol narapela Pasifik ailan kantri bihain taim.

Ol opisa i kisim skul long wei bilong kisim pis na lukautim pis na dispela i ksim tu wok akuakalsa.

Long taim bilong amamas long ol opisa NFA menesing dairekta John Kasu i tok laik bilong NFA long salim ol opisa i go skul moa i bin stap longpela taim inap long dispela taim.

Em i tok em i gutpela ol opisa i kisim dispela skul na i kamap bihainim hatwok ol i mekim.

Em i tok tingting bilong kamapim kain skul i kamap bihain long ol toktok namel long gavman bilong Papua Niugini na Australia.

Em i salensim ol greduet long ol i mas kamapim wok long save ol i kisim.

“Salens bilong mi em long lukim yupela i mekim wok wantaim save yupela i kisim,” Kasu i tok.

“Mipela i sot long planti samting tasol wantaim kain save yupela i kisim dispela bai helpim mipela.”

Em i tok ol bai skruim dispela program wantaim Tasmania Yunivesiti long ol yia i kam.

Australia Hai Komisina long Papua Niugini Bruce Davis i tok greduesen bilong ol i kamap bikos long gutpela risets wok ol i mekim.

Em i tok wantaim dispela skul ol i lainim nupela rot bilong wok piseris.

Ol NFA opisa wantaim John Kasu, NFA menesing dairekta (baksait wantaim no gat greduesen kolos) na ol tisa bilong Tasmania Yunivesiti na Nu Saut Wels Yunivesiti, Australia i bung na kisim poto. Poto: Paul Zuvani





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)

Manus polis i helpim long was long ol refuji

Sam Seke i raitim

OL polis long Manus i wok wantaim ol imigresen opisa na sekyuriti long was long dispela ditensen senta bilong ol refuji na asailum sika i stap long Manus.

Provinsal Polis Komanda bilong Manus, David Yapu i tok ol i mekim wokbung bikos ol i no laik lukim ol hevi

i kamap long dispela senta. I gat planti wari i stap long wanem samting bai kamap sapos, tingting bilong ol refuji long Manus long go stap long Amerika i no kamap tru. Na i gat wari tu long salim ol asailum sika i go bek long kantri bilong ol. PPC Yapu i tok ol polis i gat wanpela sistem we sampela opisa bilong ol i go helpim ol

imigresen na sekyuriti long ditensen senta. Em i tok long taim ol dispela refuji i lukim yunifom bilong ol plisman, ol i save stap isi. I gat samting olsem 900 pipel i stap long dispela distensen senta. PPC David Yapu i tokim Sam Seke olsem bikipela wari bilong ol nau em ol i sot tru long ol polis long Manus.



Ol asailum sika long Manus ditensen senta.

UN i wari long ol pipel long wes Mosul

AMI bilong Iraqi i statim bikipela wok nau long kisim bek wes Mosul long han bilong ol birua. Ol i wok long muv isi isi i go olsem long ples balus na go long ol hap we planti pipel i stap. Samting olsem 3,000 soldia bilong Islamik Stet (ISIS) i stap long dispela hap na ol i tok bai ol i sanap strong na pait. Dispela hap i las strongpela eria long siti ol i wok long holim yet. Ol ripot i tok samting olsem 650,000 manmeri i pas i stap long dispela west hap bilong siti. Yunaitet Nesens (UN) i tok planti ol dispela pipel i sot tru nau long fuel, kaikai, wara bilong dring na ilektrik pawa. Smok i wok long kamap long hap we ol balus bilong USA i wok long dropim bom long taim ol soldia i wok long mas i go long hap. Long taim ol soldia i go insait long saut na saut-west Mosul, ol i no bin bungim ol birua. Tasol ol i ting long taim ol i kamap namel long siti, bai i gat bikipela pait i kamap bikos spesel yunit bilong ol paitman bilong ISIS i wok long hait long dispela hap. Ol senia opisa i ting bai pait long dispela hap i stap

longpela taim olsem i bin kamap long is hap bilong siti. Dispela pait i bin kamap long namel bilong mun Oktoba las yia, na i pinis long mun Janueri long dispela yia long taim ol ami bilong gavman i kamap long wara Yufreitas long boda bilong is na west. Ol bom na ol lain birua yet, i bin bagarapim foapela bris long wara long dispela hap. I gat las bris i stap tasol ol kar i no inap ran long en olsem na ol lain ISIS i wok long putim was na sutim ol soldia husat i traim long kalapim dispela bris. Praim Minista bilong Iraq, Haidar al-Abadi, i tokaut long Sande long dispela operesen na bihain, 30,000 polis na soldia bilong Iraq i stat long muv. Em i tokim ol long soim rispek long human raits bilong ol pipel na helpim ol lain husat i kisim bagarap long taim bilong pait. Ol opisa bilong gavman i bilip ol pipel husat i stap long westen Mosul i sapotim ol dispela teroris bilong ISIS. Ol i wokim planti trep long ol sait strit bilong Mosul long pait egensim ami bilong gavman. Tasol i luk olsem planti ol senia

memba bilong ISIS i ranawe lusim dispela hap pinis. Sampela i go hait long Anbar provins na ol arapela i ranawe i go long boda bilong Syria we ol i joinim ol arapela senia opisa long ol ples i stap long saut Raqqa. Bikipela wari bilong ol soldia bilong Iraq em ol handet tausen pipel husat bai nidim helpim bikos ol samting olsem wara, kaikai na kandis bilong slip i sot nau, bihain long ol i helpim 217,000 refuji long isten Mosul long 17 Oktoba i kam inap nau. Opisa husat i go pas long wok bilong UN long Iraq, Lise Grande i tok ol i traim long helpim ol dispela pipel. Em i tok dispela pait long Mosul em i bikipela tru na wan wan de ol lain i wok long karim 2.3 lita wara i go givim long ol ples we gavman i kontrolim nau. Em i tok ol arapela patna i wok long givim ol imejensi kaikai, wara na ol arapela saplai i go long 878,000 pipel long taim operesen bilong kisim bek Mosul i bin stat. Mesa Raad, bilong Iraqi spesel operesen i tok ol dispela lain refuji bai go long Jeda na Qayyarah na planti

Bel isi long Hela tasol wari i stap yet

Caroline Tiriman i raitim

LIDA bilong Katolik Sios long Sauten Hailans na Hela provins i tok em i amamas long lukim gutpela sindaun na bel isi i kamap bihain long spel sekyuriti operesen bilong ol polis long Hela provins. Bisop Donald Lippert i mekim dispela toktok bihain

long em i bin go long Hela provins long wik i go pinis na toktok wantaim ol komyuniti lida. Ol polis bin statim dispela sekturiti wok long Hela Provins long mun Janueri bihain long planti pait na trabel i bin kamapim hevi na sampela pipel i bin dai. Wanpela bikipela wok bi-

long dispela sekyuriti operesen em bilong kisim na rausim ol gan long komyuniti. Dispela wok bilong ol pipel i givim ol gan i go long han bilong ol polis bai pinis 23 Februeri. Bisop Lippert i tokim Radio Australia em i wari olsem trabel bai kamap gen sapos dispela spesel polis operesen i pinis.

Australia i stretim gut ol rot long Bogenvila

Sam Seke i raitim

AUSTRALIA i gohet long helpim Atonomas Bogenvil Gavman long mekim gut moa rot long planti hap bilong Bogenvil. Las wik wanpela seremoni long putim kolta long ol rot long Buin long Saut Bogenvil i

bin kamap. Gavman bilong Australia i bin givim 4.8 milien Kina long mekim dispela wok. Memba bilong Saut Bogenvil, Timothy Masiu, i bin tok tenkyu long gavman bilong Australia long dispela helpim. Em i tok dispela helpim bai kamapim gut developmen long Buin.

Deputi Hai Komisina bilong Australia, Bronte Moules, i tok dispela projek em i hap bilong ol wok bilong Australia long ol bikipela ikononik infrastraksa long Papua Niugini. Gavman bilong Australia i sapotim tu ol wok long mekim gut moa long 300 kilomita bilong bik rot long Bogenvil.

Australia i no ken wari long wok bilong Saina long PNG

John Papik i raitim

SIF Eksekutiv Opisa bilong Pot Mosbi Semba ov Komes, David Conn i tok Australia i no ken wari nating long Saina i kam pas klostu long Papua Niugini. Mista Conn i mekim dispela toktok bihain long ol nius ripot i tok Australia i wari

long Saina i wok long putim bikipela mani long ol wok projek na investmen long ol bisnis long Papua Niugini. Em i tok strongpela wok poroman bilong Australia na Papua Niugini bai i stap strong long planti yia i kam, tasol PNG em i independen kantri na i mas tingting long

sindaun bilong en long bihain taim. Mista Conn i tok long dispela taim ol investmen bilong Saina i go long planti ol liklik na namel sais bisnis (SME) na tu ol bikipela wok projek i wok long kamap bikipela, na dispela em i gutpela samting long PNG.

WOLNIUS

ol arapela ples i redi pinis long kisim ol. Em i tok ol soldia i no kisim tok yet long muv inap ol i kisim bek Mosul ples balus. Bai ol i mekim bikipela pait long ples balus, na ol faivpela ples ol i bin kisim long Sande i bringim pait i kam klostu. ISIS i wok long yusim ol man na yangpela man long joinim ol na i yusim sampela komyuniti olsem ol banis bilong hait. Ol i wok long pairapim ol ka bom long ol geta hap bilong Iraq na nau ol i wok long yusim ol dron long spai na dropim bom long ol soldia bilong Iraq.

Ol i pret tu olsem dispela lain bai yusim ol kemikel wepon long taim pait bilong tekova long siti i kamap strong. Dispela grup i gat mastet ges na em i bin yusim long pait egensim ol Kurdish soldia. Ol teknisen husat i wok long ISIS i statim program bilong wokim ol samting bilong pait na ol i yusim klorin na ol arapela kemikel. Ol lida bilong ISIS i ranawe i go hait long ol taun long Iraq olsem Billij, Baaj na Bukamal na long Shedada long Syria. Ol i ting lida bilong ol, Abu Bakr al-Baghdadi, i wok long muv raun

long dispela hap tu. Ol opisa bilong USA i bilip ol senia memba bilong ISIS i ranawe lusim Raqqa tu na i go hait long ples wesau nau. Dispela kalifet stet bilong ISIS i liklik tru nau na ol teroris bilong ol i wok long kamapim bagarap long Yurop. Ol gavman bilong ol kantri i pait egensim ISIS, i bilip dispela grup bai i pinis long taim ol soldia i bung pait egensim ol na winim pait. Tasol ol save lain long dispela hap i tok ISIS bai i kamapim yet trabel sapos i no gat politikal proses long stretim dispela hevi.



kar bilong ami bilong Iraqi i muv i go long ples Sheikh Younis, long saut Mosul.



Stori bilong hul wara

LONG wanpela ples i stap longwe tru long taun ol pipel i gat bikipela wari long wara. Ol i digim wanpela hul wara bilong dring, waswas, wasim klos na narapela wok.

Hul wara i daun moa na i tudak tru. Ol i no inap lukim wanem samting i stap daunbilo. Ol i yusim longpela rop tru long pulim wara i go antap.

Sampela yia bihain, manmeri i bungim samting nogut i kamap long dispela hul wara. Ol i salim baket i go daun, planti taim ol i no inap kisim wara i go antap. Baket i bruk o rop bilong baket i bruk. Sampela taim ol i pilim olsem wanpela samting i pulim baket bilong ol i go daun. Ol i harim olsem sampela i paitim wara na mekim nois. Planti narapela stori nogut moa.

Olgeta i pret long kam kisim wara. Bikos tewel o wanpela spirit nogut i stap insait long hul wara. Sampela i tok: *“Papa bilong hul wara i no laik bai yumi kisim wara o sanguma i stap insait long hul wara”.*

Wanpela de kaunsil i bungim olgeta manmeri bilong ples long wanpela miting. Ol i laik painim aut rot bilong stretim wari bilong hul wara.

Kaunsil i askim ol: *“Husat i strong inap i go daun long hul wara na painim aut wanem spirit o wanem samting i stap insait long hul wara?”*

Olgeta strongpela man bilong ples i no tok orait. Olgeta i pret long go daun. Kaunsil i tok: *“Sapos yumi i no painim aut asua bilong em, yumi bai stap wantaim pret na yumi i no inap kisim wara moa. Bai yumi mekim wanem sapos nogat wara?”*

Wanpela yangpela boi i sanap na tokaut: *“Mi inap long go daun long hul wara. Tasol i gat wanpela askim bilong mi. Long taim mi go daun long hul wara, bes pren bilong mi i mas stap na holim rop. Nau bes pren bilong mi i stap longwe long ples bilong yumi. Olsem wanem bai yumi kisim em i kam?”*

Olgeta strongpela man i sanap na tokim yangpela boi olsem: *“Yu no ken wari. Mipela bai stap na holim rop. Yu go daun na painim aut”.*

Tasol yangpela boi i tok: *“Nogat! Mi laik bai bes pren bilong mi i mas stap wantaim. Yupela mas painim rot long kisim em i kam long ples bilong yumi”.*

Olsem na ol i stat long bungim mani long baim balus tiket bilong pren bilong yangpela boi.

Taim bes pren bilong em i kamap long ples, olgeta manmeri i amamas tru. Olgeta i kam bung long hul wara. Ol i taitim rop long bodi bilong em isi isi ol salim em i go daun long hul wara. Planti strongpela man bilong ples tu i sanap na holim rop.

Taim boi i kamap long as bilong hul wara, em i lukim wanpela mongki i sindaun. Na em i tokim mongki olsem: *“Nau mi save. Yu tasol as bilong problem bilong mipela. Kam mi helpim yu i go antap”.*

Em i holim mongki na givim sain long ol lain i pulim em i go antap. Olgeta man i pulim em i kam...i kam...na taim ol i kamap namel long rot, mongki i amamas long lukim lait na kalap na holim rop na klaim i go pas antap.

Taim strongpela man i lukim wanpela mongki i holim rop na i kam antap, olgeta i lusim rop na ranawe naubaut na singaut: *“Tewel bilong hul wara i bin senisim yangpela boi i kamap mongki pinis”.*

Tasol bes pren bilong yangpela boi i no pret. Em i no ranawe. No gat! Em yet i sanap na pulim rop isi isi inap long pren bilong em i kamap seif antap long graun.

Trupela pren i no save lusim yumi taim yumi bungim trabel o karim bikipela hevi long laip bilong yumi.

Angliken bisop toktok long lo bilong marit

ANGLIKEN Asbisop bilong Canterbury na York i raitim pas long ol bisop bilong sios long givim stia tok long pasin bilong marit.

Dispela pas i tok long marit, mining bilong marit na lo gavman i kamapim we i tok long man i ken maritim man na meri i ken maritim meri.

Ripot long Haus ov Bisop i tok i no gat senis i mas kamap long lo bilong sios long pasin bilong marit long dispela taim.

Wanpela niutrel mosen (neutral motion) i kamap i askim tripela grup bilong bilip (ol bisop, ol pater na ol leimanmeri) long tingting bilong ol sapos ol i sapotim lo bilong gavman o nogat.

Taim tripela grup i vot olgeta i tok nogat long lo bilong gavman, olsem ol i no laik sios i tok orait long pasin we man maritim man na meri maritim meri.

Bihain long vot Asbisop Justin i tok kamap bilong vot i no pinis bilong tok pait long lo bilong gavman.

Dispela i min sios bai tok pait long dispela tok gen long bihain taim.

Bihain long ol tripela grup i vot Asbisop i bin raitim wanpela pas long tingting ol i gat long em.

Dispela pas i tok: Dia ol susa na brata long nem bilong Krai. Bihainim Jeneral Sinod (Synod) long no ken luksave long lo bilong gavman long pasin bilong marit, mipela i tok long pasin bilong marit we dispela hevi i no stap long wanpela man o meri.

Ol manmeri i kamap long piksa bilong God. Olgeta wantaim i stap aninit long laik bilong Krai.

Tasol salens em long bilip bilong mipela long Jisas Krai.

Long stretim dispela hevi, mipela i mas pastaim save long wanem tok i stap long buk Baibel, long gutpela na stretpela tingting, long pasin skul sios i save holim, long save long God na Tok bilong em na Kristen bilip bilong mipela.

Wantaim dispela mipela i mas mekim disisen long taim bilong 21 senseri (century) we i bihainim poroman pasin we wanpela na narapela i pilim gut na amamas oltaim.

Mipela i mas wok wantaim strong na bilip, i no long ol bisop tasol, olgeta manmeri wantaim.

Disisen mipela i mekim i mas tok long pasin laikim na amamas olsem manmeri tru, olsem piksa bilong God, olsem mipela

i bilong Krai.

I tru dispela em ol skul bilong sios tasol long wanpela i bihainim dispela, sampela i hat.

Long dispela as mipela i askim olgeta Daiosesen Bisop long bung wantaim Jeneral Sinod memba olsem mipela i ken surukim dispela tok i go.

Mipela olsem Asbisop mipela bai kamapim Pastoral Ovasait grup we Bisop bilong Newcastle (Inglan) bai go pas long en.

Dispela grup bai givim skul long ol Daioses long wanem samting ol i mas mekim long sait bilong pasin bilong marit.

Namba tu samting mipela bai kamapim em ol tingting long tokaut long bung bilong ol Bisop long mun Me long olgeta i ken skelim na save long kain sindaun bilong manmeri long pasin bilong marit.

Luteran Haiskul i kamap sekenderi skul

KUNDIAWA Luteran Haiskul long Simbu bai kamap wanpela sekenderi skul nau. Dispela de haiskul long Simbu i winim 31 yia nau.

Olgeta yia i gat planti moa gret 10 studen long provins i painim spes long gret 11 na 12 olsem na Luteran Haiskul bai kamap sekenderi skul na kisim moa studen.

Ol arapela sekenderi skul long provins em Yauwe Moses, Muaina, Gumine, Kondiu Rosary na Kerowagi.

Long las wik Fonde, tupela opisa bilong Dipatmen bilong Edukesen i bin go long Kundiawa na tokaut long dispela

senis long skul.

Ol gret 10 studen bilong dispela skul husat i go long gret 11 long ol arapela skul bai i kam bek na wokim gret 11.

Nau bai nem bilong skul i senis na kamap Kundiawa Luteran De Sekenderi Skul.

I gat 850 studen long gret 9 i go inap long gret 10 we 370 em ol meri. Dispela namba i no kaulim ol nupela gret 11 husat bai enrol neks wik.

I gat 28 tisa na namba bai i go antap long 36 na 13 moa tisa bai kam neks yia long taim skul i gat gret 12 klas. Bihain long tupela yia, bai namba bilong ol studen i surik i go antap long 1,200.

ELCPNG selebretim 500 yia rifomesen

Michael Koma i raitim

EVANJELIKAL Luteran Sios long PNG i wok long redi nau long selebretim 500 yia bilong rifomesen long mun Oktoba.

Long Oktoba 1517, Martin Luther, man husat i kirapim dispela sios, i bruk lusim Katolik sios na kirapim nupela sios.

Luteran Sios long PNG i winim 131 yia long nambis na 83 yia long Hailans rijon.

Long 2015, sios i makim Roy Miringke long go pas long ol wok bilong selebretim 500 yia bilong rifomesen long kantri. Het tok bilong dispela selebren em, Liberated & Empowerment by God;s Grace to Serve.

Mista Miringke i tok ol program bilong awenes na tok save long dispela bikipela selebren i stat pinis long 17 distrik long kantri.

Em i tok bai i gat 5-pela de se-

lebren stat long Oktoba 27 i go inap long 31 Oktoba long ol distrik.

Em i tok ol distrik i kamapim Rifomesen Komiti bilong ol we i gat ol sios ida, yut, meri, gavman na mausman bilong bisnis husat bai go pas long wok.

Nesenel iven komiti bilong sios i wok long stretim faiv de program bilong ol distrik.

Mista Miringke i tok ol i tok welkam long ol arapela Kristen brata susa bilong Katolik, SDA, Yunaitet Sios na ol arapela pentekostal sios tu long kam selebret wantaim ol Luteran.

Rifomesen Komiti siaman, Rev Wesley Kerenga i askim ol arapela Kristen sios tu long kam stap insait long dispela bikipela selebren. Em i tok em i amamas olsem lida bilong Katolik Sios, Pop Francis i luksave long 500 yia bilong Rifomesen.



ELC-PNG Het Bisop Rt. Rev. Jack Urame wantaim Pastor Danny Akiro, Namba 2 Distrik Presiden bilong Goroka Distrik na Pasto Kegi Soweto, Asaroka Seket Presiden i brukim graun long Gurupoka Peris long kirapim nupela haus lotu. Poto: Rev. John Gerel.

Rev. John Gerel i raitim

NESENEL Geming Bod i helpim Gurpoka Peris long Asaroka Seket wantiam K250,000 long wokim nupela haus lotu.

Gutpela luksave na helpim i go long haus lain sios Gurpoka Paris insait long Asaroka Seket. Klostu 1000 manmeri na pikinini i kamap long seremoni bilong wokim nupela haus lotu.

Dispela haus lotu ol i bin wokim long 1937, taim Luteran sios i kam nupela insait laong Hailans na kamapim misin stesin long Asaroka.

Gurpoka Peris siaman, Evangelis Nick Gorosahau i mekim bikipela tok tenkyu i go long Prais Ministia Peter O'Neill na Nesenel Geming Bod siaman Lesley Hoffman long bikipela luksave na helpim liklik peris long haus lain long mani mak bilong K250,000 long wokim nupela haus lotu.

Long las wik Sarere, ELCPG Het Bisop Rev. Jack Urame i bin kam long seremoni na tok tenkyu lotu na em i bin mekim dispela wok. Em i tok tenkyu olsem gavman na sios i mas kamap patna long bringim sevis i go long ol pipel bilong kantri. Na tu em i bin tok olsem ol misineri na ol papamama bilong bipo i wokim long en nau yumi lukim na kisim sevis tude. Nau yumi mas mekim sampela nupela senis antap long bilip na strong bilong God. Em i tok strong long bosim na lukautim gut ol samting bilong God.

Asaroka Seket Fam Menesa Eron Hagen i tok long bosim na luakautim gut samting bilong God na kamapim senis long haus lain sios. Em i tok ol papamama wokim haus lotu, sampela i dai pinis na sampela i lapun pinis. Em i tok yumi yangpela bilong tude i mas mekim senis nau na ol pikinini bilong yumi bai amamas long karim wok bilong sios i go het yet long bihain.

Seaholda wanbel long salim InterOil

MOA long 91 pesen bilong ol seaholda bilong InterOil Corporation i wanbel long salim kampani long Exxon-Mobil Corporation.

InterOil i tok dispela 91 pesen i abrusim namba bilong pastaim we 80 pesen bilong seaholda tasol i bin wanbel long salim kampani. Tasol man husat i bin sta-

tim InterOil, Phil Mulacek, i no wanbel long ol seaholda i salim InterOil long Exxon-Mobil.

Long mun Septemba long las yia, klostu long 80 pesen bilong seaholda i bin wanbel long salim kampani tasol Mista Mulacek na sampela seaholda i no bin wanbel.

Taim Mista Mulacek i no

strongim kona bilong em na i laik stopim arapela seaholda long salim kampani, moa long 91 pesen bilong ol seaholda i wanbel pinis long wanpela spesel miting bilong InterOil long salim kampani.

InterOil i tok ol dispela 91 pesen seaholda husat i wanbel long salim kampani i

mekim gutpela disisen bikos ol bai kisim bikpela benefit taim ExxonMobil i tekova long kampani.

Long Janueri long dispela yia, InterOil i askim ol seaholda bilong ol long bihainim toktok bilong tupela proksi edvaisa Institutional Shareholder Services Inc (ISS) na Glass Lewis & Co, na sapotim disisen bilong bod na menesmen long vot long salim kampani.

ISS i tok ol i wok long stre-tim ol samting long larim ol seaholda i vot long salim kampani.

"Bod bilong InterOil i wok

long glasim ol agrimen pepa na i wok long skelim sapos dispela plen long salim kampani em i orait o no gat.

"I luk olsem bod bilong InterOil i skelim pinis na ol i tokaut long salim kampani, bod i laikim ol seaholda long sapotim ol, na salim kampani long ExxonMobil," ISS i tok.

Glass Lewis i tok bod bilong InterOil i skelim pinis ol gutpela na no gut bilong salim kampani.

"Ol i glasim pinis ol samting bilong agrimen ol i bin sainim long salim kampani. Olgeta samting long sait bilong bod bilong InterOil i kamap gut.

"Mipela i bilip strong

olsem agrimen i kamap gut na i gat planti gutpela samting we ol seaholda bai kisim sapos ol i wanbel na salim kampani long ExxonMobil," Glass Lewis i tok.

ExxonMobil i laik baim InterOil long US\$2.2 bilien (K6.85 bilien).

Sapos ExxonMobil i baim InterOil, em bai tekova long bikpela ges fil bilong InterOil long Elk na Antelope long Petroleum Ritensen Laisens (PRL) 15 long Galp Provins.

Ges bilong Elk na Antelope fil bai kirapim namba tu LNG Projek long kantri, Papua LNG Projek.

Total SA bilong Frans, Oil Search na InterOil em ol projek patna bilong PRL 15.

PNG LNG apim ges prodaksen

OPERETA bilong PNG LNG Projek, ExxonMobil PNG, bai apim 2.3 trilien kiubik fit (Tcf) bilong ges na apim mak bilong prodaksen long tupela tren.

ExxonMobil PNG i tok dispela 2.3 Tcf bai kam long ol ges fil we i PNG LNG Projek i wok long kisim ges nau long Hides na long ol arapela oil fil long Gobe na Kutubu.

Pastaim ExxonMobil PNG i bin wanbel long kisim 9.2 Tcf tasol bihain long wanpela ges asesmen konsalten kampani, Netherland Sewell & Associates Inc, i bin mekim indipenden ges risos asesmen gen long sekim hamas ges risev i stap.

Dispela risetifikesen stadi i soim olsem moa ges risev i stap long ol ges fil long Hela na Sauten Hailans.

Netherland Sewell & Associates Inc i tokim Exxon-Mobil PNG long apim 25 pesen prodaksen i go antap na dispela bai lukim 9.2 Tcf i go moa long 11.5 Tcf.

Pastaim asesmen o stadi ol i bin mekim long skelim

ges risev i bin tok long rausim 9.2 Tcf tasol bihain taim o i mekim stadi gen, ol i painimaut moa ges risev na dispela i apim mak bilong prodaksen i go antap.

"Dispela indipenden rivi i soim olsem ges risos bilong PNG LNG Projek i stap moa yet, na taim mipela i apim dispela 25 pesen i go antap, mak bilong salim ges bai go antap tu," Menesing Dairekta bilong ExxonMobil PNG, Andrew Barry, i tok.

Mista Barry i tok ol man-meri PNG bai kisim moa benefit long PNG LNG projek long plnati yia long bihain taim.

"Mipela i stap long wok wantaim gavman na ol join vensa projek patna bilong yumi, ol gavana bilong wan wan provins, ol papagraun na ol komyuniti insait long projek eria long larim ol pipel i kisim gutpela benefit i long PNG LNG Projek na senisim laip long gutpela wei," Mista Barry i tok.

Bikpela ges risev tru i ol i

bin painimaut long Hides ges fil taim Netherland Sewell & Associates Inc i pinisim driling wok long sampela ol eria we ol i no bin dril pastaim.

Taim ol i pinisim prodaksen pefomens stadi long yia 2014 na i kam antap, ol i bin mekim plen bilong rausim ges taim risev i pundaun.

Dispela olgeta stadi na plen i soim olsem Hides fil i gat moa ges risev na dispela i mekim ExxonMobil i apim prodaksen level i go anatp long 11.5 Tcf.

Long yia 2016, PNG LNG i kamapim 7.9 milien metrik tan bilong LNG long salim long Taiwan, Saina na Japan.

Dispela namba i abrusim 6.9 milien metrik tan na em i apim 14 pesen bilong pastaim namba bilong ges prodaksen ol i bin givim long 6.9 milien metrik tan long wan wan yia.

PNG LNG i save saplaim ges long 4-pela kampani long Asia – tupela kampani long Japan, wanpela long Saina na wanpela long Taiwan.

Dispela i lukim KPL i strongim ol samting bilong em long PNG na i laik groim bisnis long PNG.

Dispela 50 pesen we KPL i hoilim yet i gat sans long holim bikpela oil na ges, kampani i tok.

Dispela laisens eria em i karamapim Nipa, Crocodile na Mangrove ges prospekt.

KPL i aplai tu long 50 pesen bilong narapela laisens we ol i bin givim bek long DPE.

Kina Petroleum skruim laisens

JUNIA oil na ges eksploresen kampani Kina Petroleum Limited (KPL) i skruim Petroleum Prospekting Laisens (PPL) 581 i go moa long narapela 5 yia.

KPL bai mekim moa eksploresen wok long sekim oil na ges long dispela laisens erai.

KPL i tokim Australian Securities Exchange (ASX) olsem wanpela laisens bilong em long PPL 338 i ek-

spaia pinis long mun Septemba long yia 2015.

Aninit long oil na ges lo, sapos eksploresen laisens i ekspaisa na eksploresen kampani i no painim oil na ges, gavman i save kisim bek 50 pesen bilong laisens eria.

KPL i bihainim Oil na Ges Ekt (1998) na givim bek 50 pesen bilong laisens bilong PPL 338 i go bek gen long Dipatmen ov Petroleum na Eneji (DPE).

Ol Jiwaka meri kisim skul bilong Fainens long MiBank

Ol Woksop bilong Fainensel Literesi bilong ol lain i no save kisim bikpela mani long wan wan hauslain olsem ol meri, i stat pinis long 2017 wantaim MiBank.

Dispela yia namba wan Fainensel Literesi trening program i bin kamap long ples Koswa, Jiwaka Province, we i lukim 108 meri bilong Binz ice Ambra Asosiesen i greduet long 9 Febueri 2017.

Binz Ice Ambra Asosiesen em i nupela ogenaiesen nau tasol i kamap long sanap em yet long strongim long kamapim gutpela ikonik na sosel sindaun bilong olgeta meri long Tsenglap Traib bilong Jiwaka Provins. Asosiesen we i gat 146 meri long rejista i laik strongim ol meri long ples wantaim kain kain ektiviti na

wanpela em long wok Poro-man wantaim MiBank.

MiBank Fainensel Inklusen Yunit tim, we Genevieve Daniels na Grace Chapui i go pas long en, i stap wanpela wik long Jiwaka Provins long givim strong long ol meri wantaim besik fainensel save long helpim ol long sevim mani bilong ol long bihain taim na long long givim samting i go bek long lokal komyuniti ikonik bilong ol i ken gro helti long wanpela sastenebel wei. Ikonik empawamen bilong wanpela meri em i bungim save bilong en long tingting na save bilong mekim samting na laik na strongpela tingting long gutpela bilong en. Wantaim dispela long tingting bilong ol MiBank tim i givim ol tok stia long ol kain

bikpela toktok olsem seving, baset, na putim ol fainensel gol o mak.

Ol i ranim program long tripela de stat long 27 i go long 29 Febueri, 2017. i bin gat 108 lain i kamap long kisim trening, na 80 bilong ol dispela lain meri i gat Mi-Cash Mobail Mani akaun pinis wantaim MiBank. Wanpela MiCash Mobail Mani Ejen tu nau kirap pinis long Koswa Villes. Ol meri long Binz Ice Ambra Asosiesen i bin kamap namba wan ejen long kisim trening long yusim Androd Tablet Fon. Ol operetta i amamas long dispela kain tingting. MiBank i laik long strongim fainensel Inklusen wantaim ol nupela wei bilong wok wantaim teknoloji.



Ol Jiwaka meri kisim skul bilong Fainens long MiBank.



GET A **MICARD**
OR **MICASH**
ON YOUR **MOBILE**
IT'S YOUR CHOICE!

www.microbank.com.pg





Profesa John Warren - Vais Sansela, PNG Yunivesiti bilong Nesurel Risos na Envairomen i raitim



Planim Balsa em orait wantaim famili na graun mi gat?

BALSA diwai i save kamap gut insait long Is Nu Briten Provins (ENBP), na save kamapim mani bilong ol fama bihain long 5 na 6-pela yia.

Kamapim balsa long salim go ovasis maket tasol, no gat wei o rot stap long fama yet ken yusim balsa. Bai lukim balsa bai no inap orait wantaim olgeta fama; olsem na sapos yu husat i gat tinting long planim balsa, yu mas pastaim lukluk sapos balsa em orait tasol wantaim graun yu gat, hamas taim yu gat long wokim dispela wok na tu lukluk long nids bilong famili bilong yu.

Dispela Fact Sheet #1 bilong 6-pela em groim, lukau-tim na salim balsa. Em bai helpim yu long wokim disisen sapos balsa em orait long yu na famili. Namba wan step em long droim mep bilong graun yu gat na yusim seklist aninit na lukim wanem hap balsa ken sindaun.

Hap long planim Balsa - seklist

- Sefti:** Planim balsa 50 mita longwe long haus insait long haus lain.
- Balsa diwai stap klostu tumas long haus:** Bikpela balsa diwai ken gro longpela abrusim 35 mita na strongpela win o taim bilong katim i ken pundaun antap long haus i stap klostu. Pawa-lain: Planim balsa 50 mita longwe long pawa-lain.
- Maunten:** Planim balsa long maunten hap we i no sap tumas olsem bai isi long wokabaut go antap kam daun na dispela bai mekim taim bilong katim diwai em seif long man na ol envairomen.
- Hap balsa bai kamap gut:** Balsa save kamap gut long hap we i save kisim gutpela ren na gat planti gris long graun na long graun we no gat planti wara stap insait.
- Hamas liklik namba balsa diwai yu mas gat:** Liklik namba we yu ken planim na kisim kampani long kam katim em 60 balsa diwai na yu mas planim long 4x4 mita spes.

Rot i go long graun bilong yu na insait long graun bilong yu

- Mak i go long somil:** Mani yu yusim long kisim balsa diwai i go long somil i save antap tumas. Sapos yu stap i abrusim 20 km longwe long somil i stap klostu long yu, luk olsem bai yu no gat sans long salim balsa bilong yu bikos em longwe tumas long transpotim balsa bilong yu.
- Rot i go long graun bilong yu na insait long graun bilong yu:** Rot i go kamap long hap bilong yu mas orait oltaim long bikpela balsa kar i go insait. Bikpela balsa kar bai abrusim balsa na ol arapela samting yu planim stap olsem kakao olsem na i mas gat gutpela spes long abrusim bagarap i kamap long ol.

Moa long Balsa diwai bai kamap long neks isu...

InterOil seaholda tok orait long salim kampani

Paul Zuvani i raitim

OL InterOil seaholda i tok orait long narapela lain i baim kampani, maski sapos Phil Mulacek, man husat i kamapim kampani i tok nogat.

Long wanpela tok save pepa, InterOil i ripot olsem moa long 90 pesen bilong vot nau i tok orait long baim bilong kampani

Dispela pepa i tok dispela

i antap long 80 pesen tok orait pastaim we ExxonMobil, kampani i tok long baim i bin makim.

Kibung bilong givim dispela tok orait i kamap long 21 Septemba, 2016.

Bihain long Yukon Apil Kot i tok orait long apil bilong Mulacek, ExxonMobil nau i ken go het long baim InterOil wantaim riviu.

Senis i kamap bihain long ol sea holda i bung na

tok orait long apim prais long 80 pesen i go antap long 90 pesen bilong salim kampani.

Prais bilong salim wanpela sea em US\$78.94 (K263.13). Pastaim long dispela ol tok tok bilong salim i stap olsem long US\$45 (K140) long wanpela sea wantaim narapela US\$7.07 (K23.56) long wanpela sea long wan wan trilien kiubik fit (tcf) bikos long gutpela ges i stap long

Elk na Antelope.

Brek fi mani bilong InterOil i lukim mani mak i stap long US\$100 milien (K333.33m) na i go daun long US\$67 (K223.33).

Long wok i kamap bipo long salim kampani, Mulacek i tok i gat hevi long ol mani mak ExxonMobil i tok long baim InterOil.

Kot bilong harim apil bilong InterOil i bin kamap long las wik, 20 Februari.

Tate: PNG bungim hevi bilong diwai long Saina

Paul Zuvani i raitim

LONG prais bilong diwai, Papua Niugini i bungim bikpela salens wantaim Saina, Bob Tate sif eksekutiv opisa bilong PNG Fores Industri Asosiesen i tok.

Em i tokim Bisnis Edvantes PNG olsem ol wok developmen long Saina i wok long givim hevi long diwai bisnis.

Em i tok daun prais bilong salim diwai i kamap bikos long hevi bilong mani long wol tude wantaim ol senis Saina i mekim long dispela bisnis.

"Ol (Saina) i wok long pasim ol liklik produsa bilong ol na i wok long kamapim ol bikpela timba plantasin long kisim timba," Tate i tok.

Em i tok Saina i wok long go insait long strongim mambu bisnis bilong em na dispela i daunim bisnis bilong diwai industri.

Em i tok inap long last tupela o tripela yia ol i no bin salim gut diwai na i no kisim kain mani ol i save kisim long industri bikos long ol wok i kamap long Saina na hevi bilong mani ol kantri long wol i wok long bungim.

Benk ov PNG i tok long 2016 inap long 9-pela mun i go inap long Septemba, sekta i kamapim olsem K231.1 milien na dispela i daunbilo long yia bipo we em i mekim K241.8 milien.

"Mipela i save salim kain kain diwai i go long Saina na em i wei mipela i save mekim," Tate i tok.

"Ausait long Saina, ol i save makim stret wanem diwai ol i laikim long en.

Tasol em i tok maski long Saina i kamap wantain kain kain developmen, i gat ol narapela kantri olsem Vietnam na India husat i soim laik long diwai bilong PNG.

Tate i tok i gat wanpela

nupela projek nau wok long kamap long apim mak bilong salim na kisim gut mani em Intenesenel Egrikalsa Risets Senta bilong Australia (ACIAR) i go pas long en.

Dispela projek i helpim ol rurel ples long kamapim ol timba na salim long gutpela prais.

Dairekta bilong Risets Senta Profesa John Herbohn i tok ol rural ples insait long kantri i stap insait long dispela projek wantaim save bilong kisim tasol ol diwai bilong salim na long planim gen nupela diwai long kisim ples.

Dokta Herbohn i tok narapela lukluk long dispela projek em long painim gutpela

prais bilong ol diwai bilong PNG na salim.

Dispela projek i wok wantaim Ramu Agri-Industri long strongim diwai bisnis long kantri.

Tasol Tate i no amamas long gavman i makim bikpela takis long industri long 28 pesen i go long 50 pesen. Em i tok dispela bai mekim planti diwai kampani i pinis na bai lukim planti ol manmeri i pinis wok tu.

Em i tok fores o diwai bisnis i bin sapotim PNG ikonomi wantaim US\$90 milien (K270 milien) na Tresari Minista Patrick Pruaitch i luksave long dispela bikpela kontribusen.



Keppen: Bris we Jant Timba Kampani i bin save salim diwai na so das bilong em long Madang.
Poto: Paul Zuvani

Ol fiseris saientis kisim trening bilong wokim gutpela risets

Stori i kam long NARI

TUPELA kwarantim opisa bilong Nesenel Egrikalsa Risets Istitut (NARI) nau bai i ken wokim gutpela risets long fil bikos long gutpela kepesiti bilding projek we Australia Senta bilong Egrikalsa Risets(ACIAR) i fandim.

Arthur Roberts na Maima Sine i stap namel long ol namba wan lain bilong ol 19 pipel bilong olgeta 4-pela rijon long Papua Niugini long pinisim gut wanpela 4 yunit trening.

Ol narapela lain i makim Nesenel Fiseris Atoriti (NFA), Forestri Risets Institut, Wildlife Konsevesen Saisaiti, Nesenel Fiseris Koles, Yunivesiti bilong Nesurel

Risos na Evairomen.

Mista Roberts i tok olsem trening em i kamap long taim stret olsem integreted skil-bes bilong risets long helpim ol saientis i mekim wok risets bilong ol gut.

Em i tok, 'Mipela i no gat sans long wokim ol kain trening long lainim ol dispela tul na skil long kisim haia level output long risets. Dispela projek bilong NFA wantaim ACIAR em i bikpela hap bilong developim ol yangpela saientis husat i no gat mentoring na wok long kamapim ol wok laip bilong ol.'

Em i tok ol kain trening i helpim long wok bilong ol saientis long fil.

Dispela kain tingting i bin kamap long NFA na Yunivesiti bilong Tasmania

(UTAS) long kamautim ol save we ol i nidim long wokim ol risets na projek menesmen bilong ol saientis na teknisen bilong ol fiseris risets.

Projek i kamap wantaim tingting bilong disainim, bringim na strongim fomol akredited trening program we em i bilong developim kepesiti o save bilong ol fiseris na long yusim ekspirians bilong ol olsem as bilong ol sumatin i ken go long moa stadi long UTAS.

Dispela greduet setifiket program i bin stat long Februari 2014, wantaim wanpela integreted patisi-petori we long developim ol risets skil na long wankain taim lukluk long ol benefit bilong en.

Ol autkam bilong namba wan yunit i lukluk long painim aut ol wei bilong lainim samting long kamapim ol narapela save we ol inap yusim long ples bilong wok. .

Plantu sumatin i amamas long lukim kain skul i kam long wei bilong ol bikos i no gat palnti ol kain trening we i bes long program i stap insait long gavman dipatmen long wokim risets na developmen.

Ol sumatin i tok ol i lainim ol save we ol i no bin gat bipo.

Ol projek lida bilong UTAS Prof Janelle Allison na Jacob Wani i tok tenkyui long ACIAR long olgeta sapot bilong ol long kamapim moa save insait long kantri.



Pasin poroman namel long PNG na China wokman strong long BSK

RAMU NiCo Projek long Madang i bringim kamap planti kain pasin poroman na gutpela wok-bung pasin namel long ol wokman meri bilong China na Papua Niugini.

Dispela pasin bilong wok bung wantaim na serim tingting na lainim samting na wok wantaim i soim fren-sip we pastaim i no gat.

Tude, planti lokal wokman bilong rurel viles long Kurumbukari long Usino-Bundi distrik na Basamuk long Raikos distrik i save gut tru long ol pasin na liklik ol stail na kalsa bilong ol lain China, na ol lain China tu i save long ol pasin na stail bilong ol PNG.

Wanpela gutpela eksampel long pasin bilong wok wantaim em i save stap long ol woklain long Basamuk Rifaineri Weahaus Dipatmen wantaim Suprintenden bilong ol, Mista Zhu Hongyu.

Mista Zhu em save laik ol i kolim em olsem Peter Parker, na em lukautim ol wok lain long BSK Rifaineri Weahaus Dipatmen.

Ol wokman bilong Weahaus Dipatmen i save amamas long wok wantaim dispela bosman bilong China bikos ol i tok em gutpela bos, na em save mekim gutpela pasin long ol na ol lain i save amamas long em.

Mista Zhu o Peter Parker em bilong Liao Ning provins long Noten China na em i stap wok wantaim Ramu NiCo Projek moa long 6-pela yia nau.

Mista Zhu i tokaut olsem

em save amamas long wok wantaim ol wokman bilong PNG olsem ol lain bilong Ramu NiCo, Raibus Enjiniering Limited (REL) na ol lokal man em Ganglau Lenona Kampani.

Em i tok em wok longpela taim liklik long PNG na save gut long sampela pasin bilong ol PNG wokman na dispela i givim em tingting na bilip long wok klostu wantaim ol.

Mista Zhu i tok ol PNG wok lain i save gut long wok bilong ol na save wokim samting stret taim ol i kisim stia tok o taim bosman i givim ol wok long wokim.

Mista Zhu em gutpela bos na ol PNG lain husat i wok olsem tim lida long BSK Weahaus dipatmen i save amamas long wok bilong em.

Taim Mista Zhu i go bek long China long malolo bilong em na kambek, em save bringim sampela liklik presen long givim ol wokman bilong em.

Basamuk Rifaineri Weahaus Dipatmen em wanpela bikpela seksen long Basamuk Rifaineri bilos em i save lukautim olgeta saplai na pats na ol risoses bilong rifaineri plent na operesen.

Mista Zhu i stori olsem BSK Rifaineri i gat 5-pela bikpela weahaus na dispela ol eria i save lukautim ol spea pat, ol kemikol na tu ges na risos. Weahaus Dipatmen i lukautim tu wanpela ges sevis stesin we i stap ausait long rifaineri geit.

Mista Zhu i tok olsem ol wok lain long BSK Weahaus Dipatmen i save lukautim bikpela seksen stret. Long olgeta mun tupela bikpela sip, Cape Nati na Cape Naso i save go sua long bikpela bris long Basamuk long karim ol MHP (miks haidrox-aid prodak) long go salim long ovasis maket. Taim ol dispela bikpela sip i kam long karim ol MHP, ol wok lain long Weahaus Dipatmen i save bisi stret.

Mista Zhu i tok tu olsem ol bikpela ovasis sip tu save go sua long Basamuk Port na ol save bringim ol hevi fiul, laim paura, na ol pats na masin long wok long rifaineri. Planti taim ol dispela bikpela sip i save kam olsem long Australia, Niu Silan, Germany na Finland. Ol lokal sip bilong Consort Shipping tu save karim ol saplain long Lae i go long Basamuk Port, na ol wokman bilong Weahaus Dipatmen i save karim i go storim long weahaus.

Mista Zhu i tok em i amamas long wok wantaim ol PNG na lokal wokman bikos taim ol i wok klostu wantaim ol China wok lain ol i ken serim tingting, pasin na kalsa na dispela bai promotim pasin poroman na frensip.

Em i tokaut tu olsem planti ol lokal PNG wok lain i save pinis long sampela kain pasin na kalsa bilong ol China wok lain bikos ol i stap wantaim ol oltaim na ol i lukim na save gut pinis long kalsa na stail bilong wok.




Basamuk Rifaineri Weahaus Dipatmen Suprintenden, Zhu Hongyu i wok long opis bilong em.



Mista Zhu wantaim tupela wokman bilong em.



Seksen insait long Basamuk Rifaineri Weahaus.



Mix Dogs i daunim Redbacks na kisim Gol Pas



Fainal resis bilong Sauten Lek Coca-Cola Ipatas Kap salens i bin kamap long las wik Sarere long Kone Tigers pilaia graun.

Philemon Tame i raitim

LONG Sauten Lek bilong Coca-Cola Ipatas Kap, ol Tokarara Mix Dogs i bin daunim ol City Redbacks, 30-6, long fainal na i winim Sentral Provins Golden Pas long go long Goroka, Isten Hailans Provins, bilong resis long bikpela level bilong Ipatas Kap salens.

Ol Dogs i bin redi gut tru na i kam wantaim strong bilong ol long daunim ol Redbacks bihain long Minista bilong Spot, Justin Tkatchenko, i bin opim pilai long Sarere, 2.00 klok apinun.

Senta pilaia, Jimson Mepil, i bin putim namba wan trai bilong ol Dogs na Stanley Yaone i bin isi tasol kikim konvesen i go insait bi-

long bringim skoa i go antap long 6-0.

Tasol ol Redbacks i bekim trai bilong ol bihain long wangepa penelti i kamap egensim ol Dogs na Mark James i putim trai taim ol i bin salim bal i go long em. Jonah Kautu Jnr i bin sanap long kona na kikim konvesen i go insait we skoa i sanap olsem 6-6.

Muka Peter bilong ol Dogs i brukim banis bilong ol Redbacks na putim namba tu trai bilong ol. Konvesen kik i no bin go insait na ol i bin bungim taim bilong malolo.

Ol Dogs i kamap strong-pela tim long stat bilong namba tu hap i go inap long pinis bilong resis. Mepil i putim namba tu trai bilong em na namba tri trai bilong

ol Dogs we konvesen i no bin go insait. Ol i bin stap pas yet wantaim 14-6 poin.

Fulbek bilong ol Dogs, Gabriel Taune, i skorim namba 4 trai bilong ol wantaim konevsen kik i go insait i bringim skoa bilong ol i go antap long 20-6 poin.

Ol Redbacks i bin mekim planti asua we ol i painim hat long skruim skoa bilong ol.

Taune i bin putim namba tu trai bilong em bihain long wangepa skram i kamap na hapbek, Yoane, i bin salim bal i go long em. Taune yet i bin kikim konvesen i go insait na skruim skoa bilong ol i go antap long 26-6 poin.

Las trai bilong ol Dogs i kamap bihain long winga bilong ol, Terence Cross, i stilim bal na putim trai.

Ol Paga i winim NCD Golden Pas

Philemon Tame i raitim

OL Paga Panthers i bin holim strong ol QPR Wanderers na daunim ol wantaim 4-pela poin long winim Golden Pas long go resis long Mt Hagen, Westen Hailans Provins, long bikpela lek salens bilong Ipatas Kap.

Ol Paga i bin winim NCD Golden Pas long las wik Sarere bihain long ol Tokarara Mix Dogs i bin winim Golden Pas bilong Sentral Provins.

Ol Paga i bin soim stail kala bilong ol na daunim ol Wanderers bikos ol Wanderers i bin mekim planti asua long pilai bilong ol.

Ol Panthers i bin putim namba wan trai bilong ol bi-

hain long namba tri minit bilong resis taim we Kepten bilong ol, John Jerry, i bin putim.

Hap bek bilong ol, Jeffery Para, i bin kikim konvesen i go insait long skruim skoa i go antap long 6-0.

Tasol, Para i bin dropim bal taim ol Wanderers i kikim bal i kam klostu long 10 mita bilong ol Panthers. Ol Wanderers i salim bal i go long kepten bilong ol, Adam Korave, na em i bin brukim banis bilong ol Panthers na bekim trai bilong ol bihain long skram i kamap.

Faiv-eit bilong ol Wanderers, Billy Johnson, i no painim hat long kikim konvesen kik i go insait long

bungim skoa bilong ol, 6-6. Wilfred Wak bilong ol Panthers i bin putim namba tu trai bilong ol bihain long 10-pela minit. Tasol, konvesen kik i no go insait na ol i bin stap pas wantaim 10-6 poin long namba wan hap bilong resis taim.

Winga bilong ol Wanderers, Peter Wai, i bin putim namba tu trai bilong ol na bungim skoa, 10-10, bihain long konvesen i no bin go insait.

Ol Panthers isi isi brukim banis bilong ol Wanderers prop bilong ol, Israel Steven, i bin putim las trai klostu pinis bilong resis.

Ol Panthers i bin daunim ol Wanderers wantaim 4-pela poin na winim Golden Pas.

Wisil i winim Sempion bilong Australia

NAMBA wan meri rana bilong Papua Niugini, Toea Wisil, i daunim sempion bilong Australia, Melissa Breen, long 100 mita resis.

Breen i save holim nesenel rekot, tasol Wisil i bin winim em long asples bilong

em long Canberra, Australia, long ACT Sempionsip long las wiken.

Wisil i setim nupela nesenel rekot long 200 mita resis we em i bin winim mak insait long 23.23 seken na winim 100 mita resis insait

long 11.29 seken taim Breen i winim mak insait long 11.33 seken.

“Dispela rekot bilong Toea i lukim olsem em bai kwalifai long Wol Sempionsip,” Presiden bilong Eytletik PNG, Tony Green, i tok.



Melissa Breen na Toea Wisil i resis long ACT Sempionsip long Canberra, Australia, long las wiken.

Tigers i winim gen Melanesien Kap

Premia bilong 2016 Digicel Kap salens, Lae Snax Tigers, i winim gen 2017 Melanesien Kap wantaim bikpela poin bihain long ol i bin daunim ol Nadi Aviators bilong Fiji, 40-4, loOng Lawaqa Pak long Sigatoka, Fiji, long las wik Sarere.

Ol Tigers i win em i namba tu taim bilong PNG long winim Melanesien Kap salens bihain long ol Rabaul Gurias i win long yia i go.

Presiden bilong PNG Ragbi Futbal Lig, Sandis Tsaka, i amamas na tok tenkyu long ol Tigers long soim namba wan kala long winim bek Melanesien Kap.

“Mipela i amamas long kala bilong yupela long olgeta taim bikos yupela i makim kantri bilong mipela long Melanesien Kap resis,” Tsaka i tok.



Ol pilaia bilong Lae Snax Tigers bilong Papua Niugini na Nadi Aviators i bin sanap bung wantaim.

Wewak i daunim Sunset Tenkile long Ipatas Kap resis

WEWAK Ragbi Futbal Lig i winim Coca-Cola Ipatas Kap resis long Sepik long las wik Sarere long Maprik Spot pilai graun.

Ol Wewak i daunim ol Sunset Tenkile bilong Vanimo, 8-6, long ai bilong bikpela namba bilong ol pipel bilong Maprik.

Long wankain taim, Memba bilong Maprik na Deputi Spika bilong Palamen, John Simon, wanmtaim CEO bilong Ipatas Kap, Timothy Lepa, i bin stap tu long taim bilong fainal.

Lepa na lokal Memba i bin stap wantaim na givim Golden Pas i go long skipa bilong Wewak, Kanah Moke.

Simon i tok tenkyu long Wewak tim bilong ol i bin pilai gut na winim Golden Pas. Em i strongim ol long go het na soim wankain kala long bikpela level bilong Ipatas Kap resis bai kamap long Goroka, Isten Hailans Provins, na i ken kisim ples long resis long Gren Fainal salens bai kamap long Wabag, Enga Provin.



1



2



3



4



5

1 Winga bilong Munkas i redi long rausim bal taim tupela bilong Monabo i ran long stopim em. Munkas i mekim wanpela bikipela win 12-0 long Sande pilai bilong ol wantaim Monabo long PMSA soka resis. Munkas tu i mekim histori long PMSA long win long bikipela skoa.

2 Pilaia bilong Mainum i traim long giamanim pilaia bilong Blu Kumul wantaim lek bilong em tasol Blu Kumul pilaia i putim gut was long em long PMSA resis long Mosbi.

3 Ketsa bilong Saints i lukluk long bal long glap bilong em.

4 Pilaia bilong PNG Pawa i slait long best aim pilaia bilong Saints i lukluk long bal taim ol i tromoi long em.

5 Beta bilong Mariners i putim gut tru was long pitsa bilong Stringers long pilai bilong ol long wiken long Mosbi.

6 Harold Joe bilong PNG Pawa B Gret i pilai namba wan gem bilong em long las wik Sande taim tim bilong em kisim Saint. Harold em wanpela yangpela mangi save ful taim long trening.

7 Gol Atek (GA) bilong Air Niugini i lukluk long pasim bal long wan pilaia bilong em taim ol Pro Clean pilaia i banisim ol long mesa semi fainel bilong Praivet Kampani Netbal.

8 Gol Atek bilong CPL i painim ol wan pilaia bilong em taim Brain Bell gol kipa na gol difenda i traim long banisim em.



6

Ol poto: Nicky Bernard



7



8



DIANA White
Barbecue Flavour

WHITE TUNA
insait
K 2.20

Tasty and Flavourful White Tuna for Everyone!

Manufactured by:
RD Tuna Canners Ltd.

Nominesen bilang 2017 Spot Awod i op

NOMINESEN bilang 2017 SP Spot Awod i op nau. Ol i bin opim asde, 22 Februari, long Het Opis bilang SP Brewery long Pot Mosbi.

Dispela yia i makim 25 yia bilang SP

Spot Awod we SP Brewery i luksave long sampela namba wan spot man na meri long Papua Niugini.

Presiden bilang Papua Niugini Olimpik Komitei (PNGOC) i tok, "SP Brewery i stat sapotim spot long kantri long yia 1992 i kam inap nau na mipela i laki long i gat dispela sapot.

"Spot long Papua Niugini i kamap bikpela na ol etlit na opisal bilang mipela i wok hat long winim driman bilang ol.

"Ol pipel bai mekim SP Spot Awod long winim mak aninit long nominesen bipo long seleksen panel bai mekim fainal disisen."

Menesing Dairekta bilang SP Brewery, Stan Joyce, i strongim wok bilang spot long kantri na laip bilang ol pipel.

"Spot em i wanpela bikpela samting we em i save bungim ol pipel nau ken luksave long ol pilaia bihain long ol i winim mak bilang spot wantaim gutpela kala.

"Long 24 yia i go, SP Awod Komitei i bin kisim 936 fainal etlit long ol 2000 na moa nominesen. Ol etlit we SP Spot Awod i bin luksave long ol em Head Hunter, Stanley Nandex, Ragbi Lig pilaia, Marcus Bai, nambawan swima, Ryan Pini, Weitlifta, Dika Toua, Pawa lifta, Linda Pulsan, na nambawan rana, Toea Wisil," Joyce i tok.

Minista bilang Spot, Justin Tkatchenko, i tok tenkyu long SP Brewery long ol i go het na sapotim spot long kantri insait long 25 yia.

"Mi tok tenkyu long SP Brewery long bikpela sapot long spot. Nau mipela i lukluk long planti ol namba wan pilaia bilang spot husat i kam anatp long kisim ples bilang ol bipo namba wan pilaia bilang yumi," Tkatchenko i tok.

Tkatchenko i tok moa olsem Gavman bai go het long stap baksait na sapotim spot long kantri olsem em i bin kamapim ol spot fesiliti insait long 4-pela yia.

Ol bai givim 2017 SP Spot Awod aninit long 11-pela grup em, Man etlit bilang yia, Meri etlit bilang yia, Tim bilang yia, Nesenel Pefomens bilang yia, Komyuniti spot inisietiv, Junia man etlit bilang yia, Junia meri etlit bilang yia, Namba wan spot man o meri wantaim disabiliti, Spot opisal bilang yia, Spot poto bilang yia na Spot media awod.

"Nominesen bai pas long Epril 3, 2017 na mipela i laik lukim planti nominesen long olgeta hap long kantri," Sir John i tok.

Ol bai makim tripela wina bilang ol wan wan grup na, ol bai tokaut long Me 27 long Stanley Hotel long Pot Mosbi.



SP Sports Nominesen i op: Sports Nominesen i op nau long 2016/17. Dispela yia 2017 bai namba 25 yia SP Brewery i sponsa long ol Sports Manmeri bilang PNG husat i pilai strong. SPB Manesing Dairekta Stan Joyce, Seketeri Jenerel bilang Sports Federation na Olimpik Komitei, Auvita Rapilla na Spots Minista Justin Tkatchenko, i opim nominesen long SP Brewery. Poto Nicky Bernard



Valvoline

PMV DIESEL OIL

PMV OIL BILONG YUMI

BOROKO MOTORS

PORT MORESBY 325 5255
LAE 472 1144
MT HAGEN 542 1933
TABUBIL 649 9048
KIMBE 983 5035
MADANG 422 2659
KOKOPO 982 8193
GOROKA 532 3552

Email: info@borokomotors.com.pg
Website: www.borokomotors.com.pg